

## **Uunga siunnersuut: Ilisimatusarfik pillugu Inatsisartut inatsisaat nr. xx, xx. xxx 2018-imeersoq**

(Ilinniartitaanermut, Kultureqarnermut, Ilageeqarnermut Nunanut Allanullu Naalakkersuisoq)

### **Saqqummiussaq**

#### **Siullermeernera**

Ilisimatusarfik pillugu Inatsisartut inatsisissaattut siunnersuut Naalakkersuisut sinnerlugit maanna saqqummiutissavara.

Ilisimatusarfik pillugu Inatsisartut inatsisaat maanna atuuttoq siunnersuummut annertuutigit tunngavigineqarpoq. Inatsisartulli inatsisaanni kapitali 2 ilinniartitaanernut tunngasoq Inatsisartut inatsisaanni matumani ilaajunnaarpoq, qaffasinnerusumik ilinniartitaanerit pillugit Inatsisartut inatsisaanni immikkuullarissumi, ataatsimiinnermi matumani assigisaanik siunnersuutitut saqqummiunneqartussami ilaalertussaammat.

Rektorimut, rektorip tullersortaanut, instituttini aqutsisunut kiisalu immikkoortortani aqutsisunut ilinniakkatigit piumasaqaatit allannguutit ilaattut taaneqarsinnaapput. Atorfinni taakkunani siunissami inuttaalertussat ph.d.-mik ilinniagaqarsimasuussapput, kandidatitut ilinniarsimanissaq maannamut piumasaqaataasimagaluartoq. Inatsisartulli inatsisaata atuutilerneraniit ukiuni siullerni qulini nutaanik atorfinitsitsinerni immikkut akuersissuteqartoqarsinnaavoq, qinnuteqartunik naleqquttunik ph.d.-mik ilinniagalinnik naammattunik pissarsisinaanissap maanna ajornakusoorsinnaanera nassuerutigineqarluni. Ilinniarsimasamik taamatut aalajangersaasoqarpoq ilinniartitaanerit pitsaassusaasa pitsanngorsartuarneqarnissaat qulakkeerniarlugu.

Siulersuisut, ilinniagartuut siunnersuisoqatigiivi kiisalu instituttini siunnersuisoqatigiit pillugit maleruagassat annertunerusumik allanngortinnagit ingerlateqqinneqarput. Maannakkulli aalajangerneqarpoq, siulersuisunut ilaasortat avataaneersunit arfiniliusuni minnerpaamik pingasut aalajangersimasumik Kalaallit Nunaanni najugaqassasut. Aamma aalajangerneqarpoq, siulittaasoq Kalaallit Nunaanni najugaqassasoq.

Bacheloritulli ilinniartitaanerit inuussutissarsiutinut sammititaasut kiisalu bacheloritut ilinniartitaanerit ”qangatoortut” assigiinngisinneqarunnaarput, taakku assigiinngissutaat malunnaateqarpallaarunnaartutut isikkoqarmat, nunanilu tamalaani ilinniartitaanerit taakku assigiinngitsut qaqutiguinnaq assigiinngisinneqartarmata. Tamatuma kinguneranik sulisut sinniisaannik kiisalu suliaqarfinnut taakkununga sinniisunik ilinniagaqartut akornanneersunik qinersisoqassatillugu aamma assigiinngisitsisoqarunnaarpoq.

Ilinniagartuut siunnersuisoqatigiivisa inuttalersugaanerit allanngortinneqarpoq, taamaasilluni rektori aamma rektorip tullersortaa siunnersuisoqatigiinni ilaasortajunnaarlutik. Ataatsimiinnernili alaatsinaatsutut peqataasinnaapput. Ilinniagartuut siunnersuisoqatigiivi pissutsini amerlaqisuni rektorimut, inaarutaasumik aalajangiisartuusumut inassuteqartartuunerat allannguinermut pissutaavoq.

Pitsanngorsaanermut pitsaassutsimillu siursaanermut siunnersuisoqatigiit pilersinneqartarunnaassapput. Siunnersuisoqatigiit taakku suliaasaat suliaqartitani allani iluaqutissartalimmik inissimasinnaasut nalilerneqarpoq. Ilinniartitaanerit aqqissuunissaasa,

ingerlanneqarnissaasa ineriartortinnissaasalu qulakkeernissaat instituttini siunnersuisoqatigiit ilaatigut sulissarilerpaat, kiisalu ilinniartitaanernik ilinniartitsinernillu nalilersuinernut malinnaaqittoqarnissaa nakkutigisussaallugu. Immikkoortoqarfinni aqutsisut atuisunik, ilinniartitaanermut tunngasunik kiisalu ilinniakkat atorlugit atorfiniffiusinnaasunik misilittagalinnik paasisimasalinnillu akuutitsissasut ilanngullugu oqaatigineqassaaq.

Naalackersuisut siulersuisullu ineriartortitsinissamut isumaqatigiissusiorsinnaanerat nutaatut aamma aalajangersarneqarpoq.

Ilinniartut anguniakkaminnut atatillugu ingerlataannut Ilisimatusarfik aningaasartuutitut akiliisassasoq atortorissaarutinillu atugassiisassasoq, assigisaanillu ilinniartut ingerlataannut allanut atortussanik atortorissaarutinillu atugassiisinnaasoq naggataagut nutaatut siunnersuutigineqarpoq.

Taamatut oqaaseqarlunga siunnersuut Inatsisartunut oqaluuserisassanngortippara.